

Malaysia tiada institusi sesuai laksana hudud, bincang dengan Pakatan dahulu, kata Anwar

Malaysian Insider

April 29, 2014

OLEH MOHD FARHAN DARWIS

Malaysia masih belum mempunyai institusi yang sesuai untuk melaksanakan hukum hudud Islam, kata Datuk Seri Anwar Ibrahim.

Ketua pembangkang itu berkata, ekoran perkara itu, PAS seharusnya berbincang bersama rakan komponen mereka daripada Pakatan Rakyat (PR) sebelum membentangkan Enakmen Jenayah Syariah II Kelantan 1993 di Parlimen.

"Kita tidak boleh membayangkan situasi apabila kita cuba laksanakan sesuatu yang kita anggap penting kepada agama, sedangkan tiada institusi untuknya," kata Anwar ketika sidang media di Ibu Pejabat PKR di Petaling Jaya hari ini.

Anwar berkata, sistem kehakiman di negara ini juga masih mempunyai kelemahan dari aspek perundangannya, sekaligus menyukarkan implementasi hudud di mahkamah.

"Kita tidak boleh bicara soal hudud sedangkan sistem penghakiman kita masih tidak bebas. Saya boleh kemukakan banyak contoh, termasuk Mahkamah Syariah.

"Siapa yang akan laksanakan hudud? Hakim bagaimana? Adakah mereka bebas?" katanya kepada pemberita apabila disoal tentang persediaan Malaysia untuk melaksanakan hudud.

Pemimpin pembangkang itu juga berkata, PAS perlu membawa isu hudud kepada perbincangan Majlis Pimpinan PR bagi menjelaskan semua isu tersebut.

"Dan tentunya dalam soal hudud ini, pendirian PAS yang konsisten menjadi kontroversi kerana mahu membawa rang undang-undang persendirian ke Parlimen.

"Sebab itu kita putuskan ia dibincangkan di Majlis Pimpinan PR," kata Anwar kepada pemberita.

Anwar turut berkata agenda hudud kerajaan PAS Kelantan itu juga tidak seharusnya mengalihkan perhatian isu pokok yang menjadi asas pembentukan Pakatan.

"Sebagai orang Islam, kita tidak boleh pertikaikan hudud, walaupun kita tahu persamaan dan kaedahnya sebelum diutarakan isu hudud itu," katanya.

Isu hudud menjadi perhatian apabila rancangan kerajaan PAS Kelantan untuk membawa pembentangan hudud ke Parlimen ditentang keras sekutu mereka.

Beberapa pemimpin daripada DAP seperti Setiausaha Organisasi Kebangsaan DAP, Anthony Loke menggesa PAS meninggalkan Pakatan jika mahu meneruskan hasrat membentangkan rang undang-undang persendirian di Dewan Rakyat bagi melaksanakan hukum hudud.

Kenyataan keras daripada DAP berkenaan hudud sudah diketahui umum sejak sekian lama.

Mendiang Karpal Singh dan Lim Guan Eng juga adalah antara individu yang menentang pelaksanaan hukum itu.

MCA dan Gerakan daripada Barisan Nasional (BN) juga dilihat tidak menerima cadangan kerajaan PAS Kelantan. – 29 April, 2014.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/malaysia-tiada-institusi-sesuai-laksana-hudud-bincang-dengan-pakatan-dahulu>